

## Headlines

- 1 राष्ट्रपति द्रोपदी मुर्मू होंरें अज्ज भारत दे सर्वोच्च नागरिक सम्मान भारत रत्न कन्नै देश दे साबका उप-प्रधानमंत्री लाल कृष्ण आडवाणी होंरें गी उंदे घर जाइयै सम्मानित कीता।
- 2 बीजेपी दे सीनियर नेता ते प्रधानमंत्री नरेंद्र मोदी होंरें अज्ज उत्तर प्रदेश दे मेरठ शैहर थमां लोकसभा चुनावें दे अभियान दी शुरूआत कीती।
- 3 लोकसभा चुनावें थमां पैहले सुरक्षाबलें जम्मू-कश्मीर दे बक्ख-बक्ख जिलें च फ्लैग मार्च कीता। जम्मू-रियासी लोकसभा हल्के च 372 मतदान केंद्रें दी शिनाख्त संवेदनशील दे तौर उप्पर कीती गेई ऐ।
- 4 जम्मू-कश्मीर च अमरनाथ जात्तरा दियां तैयारियां जारी न, इसी रमानदारी कन्नै चलाने आस्तै पर्वतारोहण बचाऽ टीम दे 1300 सदस्यें गी सखलाई दिती जा'रदी ऐ।

<><><><><><>

## President-Advani

राष्ट्रपति द्रोपदी मुर्मू होंरें साबका उप-प्रधानमंत्री लाल कृष्ण आडवाणी होंरें गी उंदे नमीं दिल्ली च स्थित घर जाइयै अज्ज भारत दे सारें कोला बड्डे नागरिक सम्मान भारत रत्न कन्नै सम्मानित कीता। इस मौके उप-राष्ट्रपति जगदीप धनखड़, प्रधानमंत्री नरेंद्र मोदी, साबका उप-राष्ट्रपति वैकेइया नायडु, रक्षा मंत्री राजनाथ सिंह, गृहमंत्री अमित शाह ते आडवाणी हुंदे परोआर दे सदस्य बी उथे मजूद हे। इक सोशल मीडिया पोस्ट उप्पर राष्ट्रपति द्रोपदी मुर्मू होंरें आखेआ जे भारती राजनीति दे वरिष्ठ सदस्य लाल कृष्ण आडवाणी होंरें पूरी निष्ठा ते मिसाली प्रतिभा कन्नै 70एं बरें थमां मते समें लेई देश दी सेवा कीती। कराची च 1927 च पैदा होए दे आडवाणी होर 1947 च बंटवारे करी भारत आए हे। राष्ट्रपति होंरें आखेआ जे भारत दे सांस्कृतिक पुर्नउत्थान आस्तै उंदे आस्सेआ कीते गेदे संघर्ष दा अन्त अयोध्या च 2024 च श्री राम मंदर दे परतियै निर्माण कन्नै होएया। राष्ट्रपति होंरें आखेआ जे आडवाणी होर आजादी दे बाद दे किश गिने-चुने दे ओकडे सियासी लीडरें च शामिल न, जिनें राष्ट्र दी प्राथमिकतायें गी इक रूप दिता ते देशा गी विकास दे रस्ते उप्पर अगो बधाया।

<><><><><><>

## PM-Meerut

प्रधानमंत्री ते बीजेपी दे वरिष्ठ नेता नरेंद्र मोदी होंरें उत्तर प्रदेश दे मेरठ थमां बीजेपी दे लोकसभा चुनावी अभियान गी शुरू करोआया। इक जनसभा गी संबोधित करदे होई मोदी होंरें आखेआ जे 2024 दे लोकसभा चुनावें छडे सरकार बनाने आस्तै गै नेई पर भारत गी विकसित राष्ट्र ते दुनिया दी त्रिये नम्बरै दी अर्थ व्यवस्था बनाने आस्तै ना। उनें आखेआ जिसले भारत 5में नंबर दी अर्थ व्यवस्था बनेया उस्सलै 25 करोड़ शा मते लोक गरीबी चा बाहर आए। मोदी होंरें इब्बी आखेआ जे भारत माल तैयार करने दे खेत्तर च बडा मता निवेश करै करदा ऐ ते देश दे नौजवानें गी हर खेत्तर च केई मौके हासल होआ करदे ना। बीजेपी नै रामायण धारावाहिक च श्री राम दा किरदार निभाने आले अरूण गोविल होंरें गी मेरठ लोकसभा सीट थमां अपना मेदवार बनाए दा ऐ। उत्तर प्रदेश दे मुख्मन्त्री योगी आदित्यनाथ, राष्ट्री लोकदल दे प्रधान जयंत चौधरी ते बीजेपी दे होर बी केई नेता इस रैली च मजूद हे। उत्तर प्रदेश च लोकसभा दे चुनावें 7 चरणें च करोआए जाने ना।

<><><><><><>

## Flag-March

लोकसभा चुनावें थमां पैहले मतदातायें च सुरक्षा दी भावना भरने आस्तै जम्मू-कश्मीर दे बक्ख-बक्ख जिलें च सुरक्षाबलें आस्सेआ कल फ्लैग मार्च कीता गेआ। जम्मू-कश्मीर च 5एं मरहलें च लोकसभा चुनावें होने ना। 19 अप्रैल गी उधमपुर च 26 अप्रैल गी जम्मू च, 7 मई गी अनन्तनाग-राजौरी च, 13 मई गी श्रीनगर च, 20 मई गी बारामूला च मतदान होगा। वोटें दी गिनतरी 4 जून गी होनी ऐ। एहू मार्च केंद्री सशस्त्र पुलस बल ते जिला पुलस आस्सेआ श्रीनगर गांदरबल, बारामूला, पुलवामा,

कुलगाम, सोपोर, शोपियां, बांडीपोरा ते बडगाम जिलें च कड्डेया गेआ। इयां गै जम्मू डिविजन दे रियासी जिले दे बाहरले इलाकें च बी मार्चर्ड कड्डेया गेआ। फ्लैग मार्च इलाके च कनून व्यवस्था गी बनाई रखने दे मद्देनजर इक अभ्यास दे तौ उप्पर कीते जंदे न जिंदे च पुलसै दे सीनियर अफसर ते जुआन शामिल हुंदे ना। पुलसै दे प्रवक्ता मुजब मतदाताएं च मतदान दौरान बसाहू भरोसा बनाई रखने आस्तै मार्च कीते जा रदे ना।

<><><><><><>

### **Sensitive-Polling Stations**

जम्मू-रियासी संसदीय हल्के च लोकसभा चुनावें थमां पैहले 372 मतदान केंद्रें दी संवेदनशील होने दी शनाखत दे मद्देनजर, सखत सुरक्षा बंदोबस्त कीते जा रदे ना। राजौरी जिले दे सुंदरबनी-कालाकोट हल्के च 124 मतदान केंद्रें चा 102 संवेदनशील घोषित कीते गे ना। इयां गै जम्मू जिले दे इक ज्हार 488 मतदान केंद्रें चा 53 ते रियासी जिले च 425 मतदान केंद्रें चा 16एं गी संवेदनशील मन्नदे होई इनें थाहरें पर कुसै बी देश बरोधी घटना गी रोकने लेई सुरक्षा दे सखत इंतजाम कीते जा'रदे ना। प्रशासन आस्सेआ जम्मू-कश्मीर पुलस दे कन्नै विशेष सुरक्षाबलें गी सुरक्षा व्यवस्था बनाई रखने आस्तै तैनात करने दी योजना बनाई जा'रदी ऐ।

<><><><><><>

### **Nomination**

बीजेपी मेदवार ते मजूदा सांसद जुगल किशोर शर्मा हुंदे सने कुल 4 मेदवारें अजें तगर जम्मू लोकसभा हल्के थमां नामांकन दाखल कीता ऐ। इस हल्के लेई दुए चरण तैहत 26 अप्रैल गी वोट पआए जाडन। एकम सनातन भारत दल दे मेदवार अंकुर शर्मा होरें कल पैहली अप्रैल गी नामांकन भरने जदके कांग्रेस दे मेदवार रमन भल्ला होरें 2 अप्रैल गी नामांकन भरने दा ऐलान कीता ऐ। इस सीट लेई नामांकन दाखल करने दी खीरी तरीक ते समां 4 अप्रैल दपैहरी 3 बजे तगर ऐ। तोआई उधमपुर संसदी हल्के लेई कुल 12 मेदवार चुनावें मैदान च ना। आकाशवाणी दे जम्मू संवाददाता मुजब इनें मेदवारें च बहुजन समाज पार्टी दे अमित कुमार, नेशनल पैथर्स पार्टी थमां बलवान सिंह, बीजेपी थमां डॉक्टर जितेंद्र सिंह, कांग्रेस थमां चौधरी लाल सिंह, एकम सनातन भारत दल थमां मनोज कुमार ते आजाद मेदवार डॉक्टर पंकज शर्मा, राजेश मनचंदा, सचिन गुप्ता, स्वर्ण वीर सिंह जराल, गुलाम मोहम्मद सरूरी, मोहम्मद अली गुजर ते मेहराज दिन शामिल ना। उधमपुर संसदी हल्के लेई पैहले गेड तैहत 19 अप्रैल गी मतदान होगा।

<><><><><><>

### **INDIA-Bloc Maha Rally**

बरोधी पार्टिं दे INDI गठबंधन आस्सेआ अज्ज दिल्ली दे रामलीला मैदान च इक बड्डी रैली दा आयोजन कीता गेआ। जम्मू-कश्मीर दे साबका मुखमंत्री ते श्रीनगर थमां मजूदा सांसद डाक्टर फारूक अब्दुल्ला हुंदे सने बरोधी धडें दे केई नेताएं इस रैली च हिस्सा लैत्ता। इस मौके डॉक्टर अब्दुल्ला होरें आखेआ जे ओहू मरदे दम तगर इंडी गठबंधन गी नेई छोडडन। उनें आखेआ जे संविधान दे हितै च इंडी गठबंधन गी होर मजबूत बनाए जाने दी लोड ऐ। तोआई बीजेपी नै इंडी गठबंधन दी इस रैली दी चुक्ताचीनी करदे होई आखेआ ऐ जे लोकतंत्र गी बचाने आस्तै नेई सगुआं इक परोआर गी बचाने ते भ्रष्टाचार गी छपैलने लेई कीती गेदी रैली ऐ। बीजेपी प्रवक्ता सुधांशु त्रिवेदी होरें आखेआ ऐ जे एहू पार्टियां भारती राजनीति च विश्वसनीयता दे संकट गी दर्शादियां ना।

<><><><><><>

### **Amarnath-Yatra**

श्री अमरनाथ जात्तरा गी रमानदारी कन्नै चलाने आस्तै सुरक्षा गी यकीनी बनाने आस्तै तैयारियां जारी ना। इस लेई खास तौर उप्पर आपदा प्रबंधन ते बचाव अभियानें गी लेइयै ध्यान केंद्रित कीता जा रदा ऐ। जम्मू आकाशवाणी दे संवाददाता नै रिपोर्ट दिक्ती ऐ जे साम्बा जिले दे नड ब्लाक च पर्वतारोहरण बचाव टीम आस्सेआ श्रद्धालुएं गी मुश्कल रस्तें चा कड्डेया आस्तै टीम दे 1300 सदस्यें गी सिखलाई दिक्ती जा'रदी ऐ।

<><><><><><>

## Easter

अज्ज दुनिया भरै च ईस्टर दा त्यार मनाया जा रदा ऐ। मन्नेया जंदा ऐ जे इसाह मसीह गी सूली उप्पर चढाए जाने दे बाद अज्जै दे ध्याडे ओह परतिये जींदा होए हे। भारत दे बक्ख-बक्ख गिरजाघरें च बी मिड नाइट ईस्टर प्रार्थना कीतियां गेइयां। राष्ट्रपति द्रोपदी मुर्मू होरें भारत ते देशा थमां बाहर रौहने आले इसाई नागरिकें गी इस मौके मबारकबाद दित्ती। उपराश्ट्रपति जगदीप धनखड ते प्रधानमंत्री नरेंद्र मोदी हुंदे अलावा जम्मू-कश्मीर दे उपराज्यपाल मनोज सिन्हा होरें बी लोकें दी खुशहाली ते शांति दी कामना कीती।

<><><><><><>

## Udh. Accident

उधमपुर जिले दे चनैनी इलाके च होए दे शिडक हादसे च इक जने दी मौत ते 3 जने घाऽल होई गे न। चनैनी दे एसडीएम गुरदेव कुमार हुंदे मुजब चनैनी-मधहा राबता शिडक पर इक बोलेरो गड्डी दे डरैवर दा गड्डी पर काबू नेई रेया ते गड्डी शिडकै थमां रूलकिये हेठ इक डूहंगी खड्डु च डिग्गी गेई। मकामी लोकें दी मदद कन्नै पुलस नै जखिमए गी उत्थुआं कड्डियै चनैनी दे समुदायिक सेहत केंद्र च पुजाया जित्थे डाक्टरें इक जने गी मोए दा घोषित करी दित्ता। बाकी दे त्रऊं जखिमयें दा इलाज चलै करदा ऐ। पुलसै इस सरबंधै च मामला दर्ज करियै तफ्तीश शुरू करी दित्ती दी ऐ।

<><><><><><>

## Ficci-JKL

जम्मू च टी.बी बमारी दे अखात्मे सरबंधी जत्रें च समर्पण भावना दस्सदे होई फिक्की एफ.एल.ओ. जम्मू-कश्मीर-लद्दाख आस्सेआ Fun 4 Health दे नां कन्नै हॉफ मैराथ द्रौड दा सरिस्ता कीता गेआ। जम्मू युनिवर्सिटी थमां शुरू होई दी इस हॉफ मैराथन दा मकसद नां छड्डा टी.बी. बारै जागरूकता पैदा करना, सगुआं टी.बीह दे मरीजें गी जरूरी पोषण सरबंधी सहायता उपलब्ध करोआना बी ऐ हा। एहदे अलावा इस कार्यक्रम दरान टी.बी. बमारी दे मकाबले लेई जांच ते इलाज सरबंधी पैहलकदमिएं दी सुविधा बी उपलब्ध करोआई गेई। इस बारै मती जानकारी दिंदे होई फिक्की एफ.एल.ओ. जम्मू-कश्मीर ते लद्दाख दिएं चेयरपर्सन रूचिका गुप्ता होरें आखेआ।

<><><><><><>

## Rohan Bopanna

भारती टेनिस खड्डारी रोहन बोपन्ना ते उंदे आस्ट्रेलियाई जोडीदार मैथ्यु ऐबडन होरें मियामी ओपन च मर्दे दे डबल्स फाईनल च ऐतिहासिक जित्त हासल कीती ऐ। इनें क्रोएशिया दे ईवान डोडिक ते अमरीका दे आस्टिन क्राजीसेक दी जोडी गी 6-7, 6-3, 10-6 कन्नै शिकस्त दित्ती। 44एं बरें दे रोहन बोपन्ना, एटीपी मास्टर्स 1000 दा खिताब जित्तने आहले सब्बनें शा उम्रदराज खड्डारी ते कन्नै ऐसे दुए भारती खड्डारी बी बनी गेन जेह्दे अजें तगर दे सब्बनें ए.टी.पी मास्टर्स 1000 दे 9वें फाईनल मुकाबलें तोहडी पुज्जी चुके दे न। इस जित्त दे कन्नै उनें ए.टी.पी दर्जेबंदी च पैहली थाह फही हासल करी लैती ऐ।

<><><><><><>